

四庫全書

史部

欽定四庫全書

史部

湖廣通志卷五十七

詳校官監察御史臣陳化龍

檢討臣德生覆勘

總校官知縣臣繆琪

校對官助教臣羅萬選

謄錄監生臣李覲光

欽定四庫全書

湖廣通志卷五十七

人物志

文苑

武昌府

晉孟嘉晉書桓溫傳嘉字萬年江夏鄢人司空宗魯
孫少知名太尉庾亮領江州辟為從事亮嘗大會賓
客豫章太守褚裒問嘉安在亮令於座上自覓裒歷
觀得嘉益器之後為桓溫參軍九日宴龍山參佐畢

集風吹帽落嘉不覺溫使左右勿言觀其舉止命孫
盛為文嘲之嘉請筆作答文詞超卓四座嗟嘆後遷
長史年五十三卒

孟陋晉書列傳字少孤嘉之弟清操絕倫布衣蔬食
以文籍自娛口不及世事喪母毀瘠不飲酒食肉十
餘年親族謂之曰毀性無嗣更為不孝然後從吉簡
文帝輔政命為參軍稱疾不起桓溫躬往造焉或謂
曰陋學為儒宗宜引在府溫嘆曰會稽王尚不能屈

非敢擬議也陋博學長於三禮註論語行於世

李充晉書列傳字弘度江夏人父矩江州刺史充善楷書王導辟為丞相府掾轉記室參軍幼好刑名之學見俗尚虛浮痛抑之著學歲除剡縣令尋為大著作郎時典籍散亂充刪除繁重以類相從分作四部甚有條貫秘閣以為永制累遷中書侍郎卒所著有尚書及周易旨釋莊論詩賦表頌子顥亦有文義多所述作郡舉孝廉

南北朝費昶楚紀昶江夏人嘗為樂府又作鼓吹曲
梁武帝重之嘆曰才詞新拔有足嘉異賜絹十匹

隋黃鳳麟楚紀江夏人隋大業中舉進士累遷侍御
史比部員外有文集十卷

唐李善唐書李邕傳善邕之父有雅行淹貫古今人
號書麓顯慶中擢崇賢館直學士兼沛王侍讀為文
選注數析淵洽表上之賜賚頗渥後為涇城令坐事
流姚州赦還居沛鄭間講授受業者甚衆

按唐書本傳邕揚州江都人惟曹憲傳曰憲始以
梁昭明太子文選授諸生而同郡魏模公孫羅江
夏李善相繼傳授於是其學大興據此則善本江
夏而邕或僑居江都歟

宋廖正文獻通考字明畧蒲圻人元祐中召試館
職蘇子瞻在翰林見其所對策大奇之俄除正字時
黃秦晁張皆子瞻門下士號四學士子瞻待之厚每
來必命侍妾朝雲取密雲龍茶家人以此知之一日

又命取密雲龍人謂是四學士窺之乃明畧來謝也
紹聖間明畧貶信州玉山監稅鬱鬱不得志喪明而
歿自號竹林居士著有竹林集三卷

任獻夫字安世蒲圻人政和八年進士溫厚淳雅口
吃苦不能言而中抱淵實為文冲淡平易理致精密

歷荆門刑曹著有異績祀鄉賢

舊通志

馮洽字深之大冶人朱子門人馮倚弟子也手錄性
理諸書誦說不厭祀鄉賢

萬貞字人傑大冶人師事朱子稱其氣象儘好今浴沂章句乃朱子答貞語也

張丰應大冶人師事朱子講學白鹿洞應為講尚書周官慎刑章世稱通儒

元何維蒲圻人延祐鄉舉與常德孫以忠沅州李壽醴陵李明孫才名相埒維尤為奇特元文選載其試求賢詔有兩漢詔令之風

丘堂武昌人延祐丁巳同茶陵陳誼高醴陵馮復可

試雲夢賦文辭瞻麗與衡山何克明並擅名當時稱
邱何焉

明程立中字執夫嘉魚人家貧常役於官為尹所辱
朗吟一詩尹曰才子也會有詔求遺逸遂薦之授縣
丞以催科後期繫獄一夕成詩百首太祖原其忠愛
釋之俾復官九載致仕卒

盧文政江夏人幼嗜學溫雅有度洪武己卯舉於鄉
授吏部主事累官太僕丞致仕年八十手不釋卷著

太平一覽

朱伯驥通山人成化癸卯舉人任廣州推官從陳白沙遊論古今人才不相及白沙以為知言遂棄官歸

講學以老

以上俱舊通志

劉績本省人物考字用熙江夏人弘治庚戌進士歷知鎮江府貫穿羣籍凡所撰述根極理要著有禮記正訓蘆泉詩文集

馮世雍分省人物考字子和江夏人博極羣書才華

瞻麗工書及詩古文詞成嘉靖癸未進士累官吏部郎中出守杭州調徽州有惠政致仕歸家居二十年足迹不出公府著有三石文集呂梁志行世紀鄉賢吳國倫字明卿興國人嘉靖己酉解元庚戌捷南宮授中書遷兵科給事與李攀龍等並稱七才子時嚴嵩柄政稔其才欲致之無從也會楊繼盛疏劾嵩下詔獄臨刑時倫與王世貞往哭嵩惡之謫江西按察使知事歷任高州府禦島寇有功遷貴州提學轉河

南左參政罷歸國倫才氣橫放好客輕財歸田後聲名藉甚所著有甌甌洞正續稿數十卷行世祀鄉賢
明史稿

周炳靈字公含江夏人博極羣書常著洪山賦有石刻存選貢第一天啟辛酉入北闈傳良選得其卷擬元座司以文奇置副車任光化訓導直指薦牘有學富五車才傾八斗之語陞興縣令卒於官

邑志

劉敷仁字濬甫江夏人與譚元春以文行相砥礪所

交皆吳楚名士壬午魁京闈南歸築室於荷塘晚而
學易逍遙以終

舊通志

金聲字正希號赤

闕

嘉魚人由選貢中順天甲子鄉

舉懷宗戊辰進士初授庶常上封事數千言執政以
詞臣不當言兵欲出之外上特嘉其骨鯁擢山東道
御史磊落不阿轉山東僉事拂衣歸有燕詒閣尚志
堂歸金合稿諸文集行世

邑志

皇清吳元俊字千人江夏人讀書講學卓然自立曾預

修通志又為江夏書院長負笈從遊者甚衆後司
鐸辰溪士多所成就卒於官

胡夢發字十子大冶人弱齡入庠以黃鶴樓賦見
知當事屢試冠軍文名藉甚甲子聘修楚志乙酉
以五經舉於鄉時年七十餘新安江少司農為磨
勘官言於朝曰天下五經胡夢發一人而已年八
十四卒

方文啟字梅岩江夏人漢陽諸生為給諫文瑞從

兄端凝和易無崖岬之行好古法帖名畫藏書數
千卷多奇文秘籍工吟咏未嘗留草曰詩以適性
情寧求後世知耶卒年八十

漢陽府

明方一鳳字丹山世居黃陂之道明山弟與時少遇
異人授秘訣靜久發慧羅文恭過訪獨心器鳳凰乃
受學建水洲別館集四方同志商訂切劘徧遊金陵
豫章閩中共質所學歸以樹人善俗為已任邑人士

就正教以切已自反遷善改過尋李見羅撫郛為築

室於二程祠右顏曰丹山止所祀鄉賢

舊通志

嚴璉字別砥孝感人年十六補諸生為文宏肆倚馬
立就曾以秋闈報罷駕扁舟歸值榷使者趣之稅問
所載何物曰一船愁耳榷者悞以為鋤也仍趣之璉
走筆呈詩曰獻璞歸來泛上游忽聞榷吏鎖孤舟囊
中惟有悲秋賦聞道君王不稅愁時鍾譚極推獎之

邑志

劉南呂字師尚孝感人弱冠有聲黌序古作直擬漢
唐間明季亂生野嘆詩三十首謝去舉子業以山水
自放年四十三卒

郡志

楊兆儀字實長孝感人懷宗丁丑進士為詩文滂淠
奔放雄奇典麗荆南胡在恪亟稱之

以上邑志

皇清盧乾元字萬資漢陽人順治乙亥進士授庶常遷

刑部主事工詩律精顏柳書著有世清堂集

舊通

志

李必果字仁熟漢陽人幼敏慧十歲入庠博學有
智畧曾預修省郡二志性孝友事父母撫弟睦族
鄉里亟稱之子咸有已丑拔貢安化教諭

沈宜字大悟孝感人由明經仕至鎮江推官讀書
自經史子外旁及內典叩之娓娓不窮詩宗大白
兼長於尺牘弟完邑諸生學行為鄉里所重

屠體中字心衡孝感人幼為名諸生邑英雋多出
其門性至孝每自館歸省必與父同寢所得館穀

悉以贍族黨貧乏者每言居家孝友居官清白即
此是學人不從事躬行徒托空言無裨也年八十
二卒

王戩字孟穀漢陽人康熙戊子副榜舉山林隱
逸未赴其學最為該博工詩古文詞力追盛唐風
格新城王阮亭亟稱之著有哭星閣集數十卷
高騫字處厚孝感人順治戊子明經詩文推重一
時書法宗鍾王士林重之

彭焱字然石孝感明經通經史工書法司訓黃
安時大旱焱力請賑濟且鬻產佐之嘗與某學博
江行舟覆扳舟聯吟明日始達岸人咸異之

程正隆字子升孝感人十餘歲補弟子員嗜學敦
行所著詩文甚富尤工迴文體

李殿邦字左釐孝感人幼至孝嗜學好古康熙乙
丑進士選翰林戊辰會試充同考官分修一統志
以疾歸未一年卒

夏嘉瑞字人淑孝感人邑諸生為詩文雄健奧衍
陳百史序其全集曰大白仙才居易人才長吉鬼
才人淑殆兼之有松雲草詩督學彭禹峰弁其首
梓行世弟章夏字人千邑諸生其才尤過之早卒
夏光沅字蘭谷孝感人邑廩生人淑姪也楚文風
自熊劉後督學蔣永修振拔之功為最按邛時首
拔光沅歷試湖南北一時著作及遴選事皆委光
沅手定尋以病卒

丁光偉字雄宙孝感人淹貫經史為文雄氣逼人
康熙癸酉舉於鄉尋卒

程正萃字除只孝感人邑明經嗜學喜藏書莫不
淹洽子大戴大疏俱明經能以詩古文詞世其家
夏熙臣字無易孝感人參政時亨之孫少孤七歲
能文有神童號長益嗜學嘗遊白雲山中值雨寓
舍無書僅字彙一部取閱之終身不問難字其他
記覽類此為文不屬草尤耽詩嘗限以百韻咄嗟

立就家故饒手一編外不識權衡數遂以貧困由
明經授通城諭累補安陸府教授卒於官著作等
身所刻有慕巖詩畧

張典字南塘孝感人諸生督學蔣永修深器之風
神嶽嶽以氣節為士類先姻婭有貴顯者折簡招
十不一赴為文力追先正尤喜誘掖孤寒貧且夭
又無子士大夫深悼惜之

陳陞謨字淳洋孝感人郡廩生讀書目數行下閱

甘一史凡六過道錄佛經無不洞曉為制藝幾萬
餘首詩稱是所著有擒思錄督學潘宗洛董思凝
極賞之鄉試作五經竟日已畢年三十五卒

夏立中字映川孝感人少勤學每夜課鷄鳴方就
寢以五經冠童子軍楚地經學自此盛士爭負笈
後主湖南集賢書院二年從遊益衆辛丑成進士
引

見時

聖祖賜問家世甚悉授庶常誓以讀書報

國染疾不起雍正元年卒於京蒙

恩例乘傳歸葬生平孝友嫻睦與人交不立城府至誠
感人人自愛之柩還鄉里道路迎哭者無筭子扶
雛丙午舉人

程大純字漢舒孝感人由明經司訓麻城遷黃岡
諭獎士類振孤寒善氣迎人無秀頑皆誦之尤敦
行誼與兄大緒友愛最篤視兄子猶己子手一編

至老不輟皆洛閩遺音也子光鉅官檢討

王大綸字慕盧孝感人四歲失怙哀毀如成人弟
大績蚤卒綸撫幼姪如已出為諸生時邑令延主
西湖講席已丑成進士宰新鄭十年有惠政五攝
鄰篆調考城授中翰擢御史一年卒子廷鴻官庶
吉士

黃州府

宋潘大臨字邠老明一統志黃岡人同弟大觀皆有

詩名與蘇軾黃庭堅張耒游冷齋夜話黃州潘邠老
工詩有佳句然貧甚東坡山谷尤善之祀鄉賢

明華巒分省人物考字伯瞻蘄州人父仲賢任布政
使巒早負雋才弱冠發解登成化丁未進士歷翰林
編修性凝重文詞清麗館局推重之尋卒李文正誌
其墓祀鄉賢

潘子安黃州人由保舉任四川夔州府同知工於詩
賦有海天青嘯詩集

舊通志

韓萬鍾字天爵蘄州人歲薦嗜書史持守方正分教
休寧擢穎州學正皆以身範物不失尺寸究心天
人之理著有象緯彙編等書

秦繼宗字西汀黃岡人萬厯甲午解元庚戌進士著
禮記疏意綱鑑要畧諸書

詹馭字三畏同文裔孫少負奇姿十歲為名諸生從
學於羅念菴輪貢讓後人者三卒年三十九

劉承烈字拙齋麻城人操履清介學以格物為宗生

平閱易百四十家晚著易學就正凡國家典故講究
精博歲時會論聞者皆悅服

劉侗字同人麻城人懷宗甲戌進士客都門著帝京
景物畧行世後之吳縣任卒於維揚舟次侗以千秋
自命不苟同於世未竟其用而沒

以上舊通志

皇清劉醇驥字千里廣濟貢生生而有文在手曰歷及
長性簡靜方直勤學不倦工為古文詞嘗歎宋元
以來文體日卑因奉左國史漢為矩矱同里顧景

星張仁熙每亟稱之

高思忠字孝移黃岡諸生少穎異每試冠軍督學
高世泰修三楚文獻忠與其事順治辛卯中副榜
後領鄉薦授遠安諭以疾未赴任

陳芳烈字中紀黃岡人好古勤學博極羣書尤潛
心易理為文雄博浩行年三十卒

以上俱舊通志

朱日濬字菊廬黃岡歲貢均州訓導博洽有文行
闡揚正學士人奉為典型著有五經門卒於官

靖乃勲字敬庵黃岡諸生好讀書博聞強記受知於學使蔣永修性慷慨有經濟才甲寅山寇蠢動太守于成龍討平勲贊畫之功居多縣有蠹胥飛灑無徵糧石於其族族人莫辨勲取冊一覽即燭其弊其才智多類此子道謨辛丑進士選館出知姚安州

顧景星字赤方蘄州貢生八齡賦鰲山燈稱神童比長博極羣書詩文為海內所宗慎交遊與龔鼎

孳王士正諸人齊名楚中談風雅者必以星為最
康熙戊午以博學弘詞薦著有白茅堂集黃公說
字數十卷

欽士佃字文思黃岡人康熙癸酉鄉試第一庚辰
成進士官翰林士佃生時父方為北城兵馬副指
揮年十二孤家貧力弱汲瓶拾薪養母以孝聞性
恬淡臨事不苟磊落無城府遇人機辯寂如也工
詩歌古文疎爽幽雋掌院韓慕廬極推重之謂其

文為尹師魯梅聖俞之亞有瀛洲集行世

舒逢吉字康伯廣濟人歲貢生天資敏捷文不加
點兼嫻韜畧王甫臣之役參軍幕有籌畫功後任
瀏陽訓導上官知其才令攝縣事判決加流獄多
平反弟峻極遂古文行皆卓絕峻極書法似米襄
陽時有河東之譽

徐琮字侶蒼蘄州人九齡時入塾得遺金俟道旁
還其人補諸生腹笥甚富尤工詩畫六書之學著

有古文篆韻五卷夏逆叛土賊乘亂竊發琮率壯士火其寨賊遂奔竄鄉人德之負氣節好遊覽足跡所及醴雁初徵即納履去視非義之財蔑如也長貧斷炊賦詩自樂以老

安陸府

宋張徽明一統志天門人以詩名著有滄浪集司馬光范純仁皆與之友祀鄉賢

明陳文燭字玉叔沔陽人嘉靖乙丑進士授大理評

事時七子有時名意不可一世文燭鴈行其間不少
讓出為淮安守以治行遷四川學使轉參漕事遷大
理卿致仕歸建五嶽山房日率親故飲酒賦詩其中
著有五岳山人集歸有光序之謂其善學龍門

舊通

志

柳向陽荆門人從賀誥講學於象山書院精通洪範
太極之學為人方正嚴厲待後學不假顏色人有敗
行惟恐陽知之以歲貢任桐城諭多所成就

鍾惺字伯敬天門人萬曆庚戌進士授行人乙卯典
貴州鄉試改工部主事轉南禮部陞郎中以僉事提
學福建尋丁外艱去惺體貌清羸為人嚴冷不喜接
俗客萬曆間取歷代詩與同邑譚元春選訂名曰詩
歸愛名山水所至必極遊覽卒年五十二祀鄉賢

譚元春字友夏天門人天啟丁卯鄉試第一父早逝
有弟五人皆嚴督之事孀母魏氏最孝弱冠與同邑
鍾惺締交譚久未遇丁卯太史李明睿典楚試素知

春闈中手其牘曰此必友夏也已而果然皆賀得人
春好遊足跡徧東南喜揚人善士賴以成名者甚衆
卒年五十二祀鄉賢

以上舊通志

皇清陳應正天門人少穎敏積學善屬文補邑弟子員
孝友端方言笑不苟鄉里奉為楷模家故貧事親
養志親歿廬墓邑令魯可辨扁其門曰聖世篤孝
舊通志

胡承諾字君信天門人丙子鄉舉未仕積學多才

專以著述為事年七十五卒

舊通志

朱載震字悔人潛江貢生授石泉令卓有循聲師事王又旦歿後梓其遺集其篤於古誼如此著有東浦詩集王司寇士正序之歎為騷人之苗裔力追古作為世推重焉

德安府

宋張君房安陸人湘山野錄真宗時日本國入貢求本國神光寺記舍人詞不工令學士張君房代之張

退食多潛飲寺樓掖垣求之不獲大窘時种放以司
諫歸華山後楊億改閤忙令曰世上何人號最閤司
諫拂衣歸華山世上何人號最忙紫微失却張君房
王得臣字彥輔安陸人問學該博以文章名世嘉祐
進士官至司農少卿號鳳臺子所著鳳臺集若干卷
及江夏辨疑一卷古今紀詠集五卷塵史二卷年八
十猶嗜書史至老不倦

舊通志

宋綬宋史列傳字公垂其先趙州平棘人徙隨州博

通經史百家年十五召試中書真宗愛其文後又試
學士院為集賢校理官至資政殿大學士孝謹清介
言動有常家藏書萬卷親自校讎筆札尤精妙及卒
帝多取其書字藏於禁中祀鄉賢

宋敏求宋史宋綬傳敏求綬之子官至龍圖閣學士
家有書三萬卷皆畧誦習所著書學者多咨之祀鄉
賢

元趙卿月復之子克紹家學與許衡劉因友善嘗拜

憲司職未久謝去屢徵不起

舊通志

魯璠字嶼公應山人好學工文辭制行端肅為中牟令有賢聲居鄉以禮訓俗鄉人尊之祀鄉賢

舊通志

明華清分省人物考清字廉卿應城人穎慧博洽成化壬辰進士授蘇州推官以直免歸杜門吟咏自適為文爾雅兼通字學繪藝士人多傳之著有東軒集祀鄉賢

陳士元字心叔應城人嘉靖甲辰進士知灤州未幾

以才見忌遂解綬歸著有歸靈集及楚志

舊通志

皇清李宏建字書常雲夢人康熙壬戌進士敦行孝友
勵志詩書為文獨傳經義以謁選卒祀鄉賢

荊州府

南北朝庾肩吾南史庾易傳肩吾字慎之八歲能詩
為晉安王常侍被命與劉孝威等共十人抄撰羣籍
號高齋學士官至義陽太守封武康縣侯卒

庾信北史列傳字子山肩吾子博覽羣書尤善左傳

仕梁為抄撰學士與徐陵文竝綺麗世號徐庾體後以右衛將軍使西魏被留長安後周時為恪州刺史為政簡靜吏人安之信雖位望通顯常作鄉閭之思乃作哀江南賦以致意所有枯樹等賦及諸詩文論者謂徐陵之奇肩吾之腴子山兼之

隋蔡允恭明一統志江陵人父大業仕後梁為左民尚書允恭美姿容工於詩仕隋為起居舍人煬帝有所賦必令諷誦遣教宮人俾入宮改內史允恭恥之

由是疎斥所著有後梁春秋

唐綦毋潛姓譜字季通荆南人開元十四年舉進士
第為詩峻峭善寫物情後補宜壽縣尉入為集賢待
制遷右拾遺終著作郎

段成式唐書段志玄傳成式字柯古文昌子以廕為
校書郎博學彊記多奇篇秘籍侍父於蜀以畋獵自
放文昌遣吏止之明日以雉兔徧遺幕府人為書因
所獲儷前世事無複用者衆大驚累擢尚書郎終太

常少卿酉陽雜俎子安節仕至國子司業

薛據荆南人全唐詩小傳作河中寶鼎人骨鯁有氣魄為文卓犖不羣嘗著古興詩見志殷璠亟稱之仕至太子司議郎

戎昱姓譜荆南人至德間以文名登進士衛伯玉辟為從事常著元戎出塞詩京兆尹李鑾欲妻以女命改姓昱拒之建中間歷辰虔二州刺史

崔道融全唐詩小傳荊州人以徵辟為永嘉令累官

右補闕有詩十二卷

劉蛻字復愚明一統志荆南人荆南歲解舉人多不成名蛻始及第號為破天荒

宋夏侯嘉正宋史列傳字會之江陵人舉進士歷官著作佐郎嘗使巴陵撰洞庭賦詞極宏麗徐鉉見之曰是木玄虛之流也端拱初召試詞賦擢右正言直史館兼直秘閣賜緋魚元夕太宗御乾元門觀燈嘉正獻五言十韻詩上依韻和賜之未幾卒年三十七子

紆太子中舍

朱昂荆南人好學有清節時朱遵度好讀書號朱萬
卷目昂為小萬卷累官翰林學士以工部侍郎致仕
所著有資理論三卷弟協以純謹著稱仕至主客郎
中雍玉府翊善亦告老歸時人比之二疏昂子正葵
正辭俱登進士第

舊通志

張景字晦之公安人少從河東柳開遊悉出家書畧
之嗜學益力與孫僅朱嚴輩相麗益聲華日振真宗

詔有司計偕天下士景居首列為房襄二州文學參
軍轉寶應簿後通理真州事明一統志仁宗詔見景
問曰卿在江陵地有何景對曰兩岸綠楊遮虎渡一
灣芳草護龍洲曰所食何物對曰新粟米炊魚子飯
嫩冬笋煮鱖魚裙羹所著有洪範王霸論數十篇

元顏達龍江陵人家貧力學行義自持不苟取給於
所著有詩經講說

舊通志

明韓守益分省人物考石首人洪武中監生授宜都

諭入為監察御史與子春同改右中允守益問學博雅善屬文其詩尤渾淪可誦建文中父子列侍經筵有言必盡祀鄉賢

劉淵字伯廣江陵人宣德九年舉經明行修宣宗御批其卷曰文理通暢宜受教職命為京山諭

舊通志

昌校字育英公安人生有異稟日記萬言年十九中弘治戊午鄉舉先是公安詩文尚未大闡校弱冠時即立意為詩古文詞有黃鶴樓賦又諷在位者無取

賸民以自封殖作蚤蚤嘲以寓意

同上

劉珠字福井公安人少穎異下筆數千言立就隆慶辛未成進士與張居正為布衣交居正當國珠未嘗稍暱就其詩古文詞不事摹繪塗澤直抒其意所欲言著有疑菴集

縣志

魏良佐字襄銘江陵人中萬歷丁酉鄉舉授仁壽令歷任錢法道僉事清白自矢時論重之幼工黃庭晚益肆力二張

舊通志

劉在朝字長孺監利人天啟乙丑進士授福清令擢戶曹陞保定府憲副備兵易州解組歸以文章傳子

孫同上

黃家梧江陵人幼負奇姿為袁宏道所賞識以子彭年受業益肆力詩古文詞人推名宿同上

王文南字季豹江陵人懷宗己卯解元學問該博時人比之楊升庵詩歌伯仲七子交與多一時名宿荆郡前志乃其增修

皇清李自郁字文叔松滋人順治辛卯進士少年登第
力行孝友議論文韋根據理要早逝人爭惜之始
祖黃姓明初僑寓松滋改從外父姓蓋黃子澄後
裔也

張宏圖字文薦江陵人有雋才多讀異書為諸生
試輒冠軍中康熙丁卯鄉試第二戊辰成進士任
陝西興平令卒兄厚圖弟峻圖文與齊名

鄭其畋石首人歲貢性至孝父士前鰥居不再娶

畋竭力奉養飲食卧起不假僕婢比父卒始終如一撫叔士良幼子有成始析箸鄉人稱之十入棘閨不售以明經老積書甚富子六家變家而舉於鄉臯說與望皆庠生

襄陽府

漢劉珍後漢書文苑傳珍字秋孫少好學永初中為謁者僕射詔校定東觀五經傳記百家藝術及撰建武以來名臣傳又撰釋名三十篇以辨萬物之稱號

劉熙叙之

王逸襄陽耆舊傳字叔師南郡宜城人元初中舉上計吏為校書郎順帝時為侍中著楚辭章句其賦誄書論及雜文凡二十一篇作漢詩百二十三篇祀鄉賢

王延壽後漢書王逸傳南郡宜城人子延壽字文考有雋才少遊魯國作靈光殿賦蔡邕亦造此賦未成及見延壽所為甚奇之遂輟翰曾有異夢意惡之乃

作夢賦以自厲後溺死年二十餘

謝該後漢書列傳字文儀棘陽人明春秋左氏為世名儒門徒數百千人河東樂詳條左氏凝滯數十事以問皆為通解之名為謝氏釋行於世仕為公車司馬令以親老託疾去官會荊州道斷不得去孔融上疏薦之詔徵還拜議郎以壽終

晉習鑿齒晉書列傳字彥威襄陽人少有志氣博學洽聞以文章著稱荊州刺史桓溫辟為從事轉西曹

主簿累遷別駕奉使至京師還溫問相王何似答曰
生平所未見大忤溫旨左遷戶曹參軍是時桓溫覬
覦非望乃作漢晉春秋以裁正之後以脚疾廢子辟
疆有父風位至驃騎將軍從事中郎按漢晉春秋進
蜀黜魏已為綱目發凡矣

南北朝岑善芳棗陽人性清慎通經史仕梁為散騎
常侍謚敬所著文集七卷子七人并有操行

舊通志

唐杜易簡唐書杜審言傳易簡襄陽人晉征南將軍

預速裔九歲能屬文博學有高名擢進士累官至考
功員外郎左轉開州司馬卒所著御史臺雜註五卷
文集二十四卷行世

杜審言唐書列傳字必簡襄陽人擢進士為隰城尉
恃才傲世嘗曰吾文章當得屈宋作衙官吾筆當得
王羲之北面累遷洛陽丞坐事貶吉州司戶參軍後
入為修文館直學士卒初審言病宋之問武平一等
省候答曰吾在久壓公等今死固大慰但恨不見替

人云少與李嶠崔融蘇味道為文章四友融死審言
為服總子閑孫甫

王仕源宜城人藻思清遠深鑒文理好遊佳山水年
十八登陵山衡嶽過蘇門入太行經王屋訪太白終
南天寶中詔徵京邑討論校正孟浩然詩集為序詞
理卓絕所著有亢倉子

劉棗強襄陽人失名善為詩美麗恢瞻與李賀齊名
王武俊鎮冀州敬重之辟為從事不應表授棗強令

固辭隴西公李夷簡復聘為賓卒皮日休為撰墓碑
以上舊通志

皮日休全唐詩小傳曰休字襲美襄陽人性傲誕隱
居鹿門自號間氣布衣以咸通八年登進士第崔璞
守蘇辟軍事判官入朝授太常博士黃巢陷長安偽
署學士使為識文疑其譏已遂及禍

宋石梁明一統志光化人仕為朝散郎博通古今其
詩淡泊時出偉麗晚自晦田里有滄浪集祀鄉賢

張友正宋史張士遜傳友正字義祖友直弟杜門不治家事居小閣學書積三十年不輟遂以書名神宗評其草書為本朝第一

魏泰字道甫明一統志襄陽人崇觀間章惇為相欲官之竟拂袖還家善文辭著臨漢隱居集東軒筆錄襄陽形勝賦祀鄉賢

元暢淳夫姓譜襄陽人博學能文仕至翰林學士卒贈文肅子敏仲亦有才名

金希說姓譜襄陽人仕為內臺御史博通經史善屬文弟希舜亦有文名

陶无幹姓譜襄陽人淹貫經史嘗註易世稱為陶易明邵濟字濟時襄陽人性孝友學極淹博景泰壬午舉人同知廣州府未五十輒投簪曰瘴鄉南荒豈可戀戀以繫母思所著有哀珍集百餘卷子廷瑗進士何宗賢字邦憲襄陽人成化甲辰進士

闕

善

詩文性耿介不諧於俗著西峯類稿

徐麐均州人長於詩學嘗纂修兵志以貢司教江寧
俱舊通志

鄖陽府

明張文鄖縣人少能文領正德丁卯鄉薦歷舉進士
不第遂罷公車杜門謝客手不停披以讀書老學者
宗之

直隸歸州

漢尹珍施州母斂人桓帝時自以生於荒裔不知禮

義乃從汝南許慎應奉受經書學成還鄉里教授於
是南域始知向學官至荊州刺史

舊通志

長沙府

唐陳光問楚寶長沙茶陵人讀書靈巖山中年六十
忽有雙鶴鳴其友沈彬曰必登雲兆也是歲果同曹
松登第為五老榜撫言云天復元年令中書門下選
擇新進士及第中有久在名場年齒已高者各授一
官禮部侍郎杜德祥奏進士陳光問年六十九詔光

問可秘書省正字

五代徐仲雅楚紀其先關中人徙居長沙年方弱冠
馬希範辟置天策府與拓跋恒李弘臯廖匡圖等為
學士時造九龍殿沉香雕龍飾以金寶重斂供役仲
雅歸正不從後邊鎬入長沙仲雅遜匿周行逢慕其
名辟之不仕

宋狄遵度宋史狄棐傳子遵度字元規少舉進士為
襄縣主簿數月棄去著春秋雜說多所發明有集十

二卷

譚昭寶楚紀字珍卿茶陵人父用式仕宋為提舉昭寶五歲能讀五經知為文辭七歲應童子科中上第其謝啟畧曰七歲遠離於膝下九經流出於胸中著卦兼十極之圖蓬矢效由基之射童科雖異文解則同破雲州千古之荒駕月殿丹梯之路啟傳禁中理宗見而異之大加稱賞

鍾震姓譜湘潭人從朱晦菴受業建主一書院講道

鄉人咸宗之號主一先生

元馮子振元史陳孚傳攸州馮子振豪俊與孚畧同
於天下之書無所不記當其為文也酒酣耳熱命侍
史二三人潤筆以俟子振據案疾書隨紙多少頃刻
輒盡

張康姓譜湘潭人少孤力學旁通經術江萬里留夢
炎皆推重之辟置幕下後隱衡山元世祖遣中丞崔
縯祀南嶽就訪隱逸具以聞召康至上都親試所學

授著作郎禮遇殊厚遷秘書監丞

明陶顯位寧鄉人歲貢生授桃源教諭陞潞安教授

潛心理學以端謹著稱

府志

婁昇楚紀湘潭人永樂癸卯鄉薦第一典教以師道
自勵宣德己酉考試山西得人最多奏績廷試賢豪
贊經綸詩擢禮科給事中

黃學謙善化人以恩貢任韶州諭擢陝西興平知縣
少著文名其弟孝廉學璞學良咸侍筆硯里中知名

士多出其門著有紫巖集

府志

李兆先明列朝詩集字徵伯西涯先生之子也生十餘歲能為歌詩古文驚其長老以蔭為國子生年二十七而夭天子為致賻焉

皇清周應運善化諸生讀書尚氣節不隨世俯仰杜門著述年七十餘猶挑燈夜坐手不釋卷所著有蒲園集及集陶詩

舊通志

魏宗衡長沙歲貢生性行端方學有原本閉門著

述有移菴遂筆小學人物考孝經衍義當事聘為
岳麓書院山長不赴

江有溶長沙人專精著述尤善於詩教授里中常
炊烟不繼晏如也

趙而忭開心子廕補中書舍人少負奇才遊京師
聲名著海內與合肥龔鼎孳以文章契合有才子
之目

熊超善化人中庚午經魁治家以禮力屏異尚與

邵陽王元復寧鄉張鳴珂講明正學湖湘學者得
聞程朱之緒歸唐之蘊三人有力焉

黃夢弼善化諸生遭亂避瀏陽山中負米養親屢
瀕於危猶手一編不輟性尤剛耿面折人過晚年
訓勵子姓以根柢為文科名踵接

廖志灝醴陵歲貢生至性夙成母歿致哀盡禮徒
步謝數邑之弔送者廬墓毀瘠未終禫而卒嘗作
天闕書院欲延致同人辨似是之非採一得之長

講求正學歸於一轍有志未就

張鳴珂寧鄉歲貢生覃思經學其疏解各發新意
通涉方伎尤邃於醫曰吾未為世用聊以濟物耳
兄弟五人從弟一人共爨終身內外無間言

李明恭善化諸生嘗傾家貲為族人完賦治家一
遵古禮喪祭不用僧道里人多師效之好讀書晚
年猶手錄程氏易傳示子侄曰內聖外王之道盡
是何以多為淵源所漸族黨蔚興

蔣之綦湘陰歲貢生才性敏茂工詩文合肥龔鼎
孳稱為羅江才子然接人和厚人以是重之子常
尊亦貢太學有文行巡撫趙申喬延入星沙書院
課士有章程

陳金臺湘潭人歲貢生好經濟之學四方知名之
士經承指畫者甚衆明季獻賊破湖湘匿影衡山
益究心於古今為理得失利害其源流條貫如別
黑白如區畦畛孫鵬年蔚為名臣金臺之教也

徐日東益陽諸生居家孝友雍睦好讀書善誨人子弟皆掇科名持身嚴正人不敢干以非禮中年失偶終身不再娶晚年學益邃清言妙理為士林宗

夏寔大益陽人由明經授武昌訓導先是益陽歲輸悉由里長民病侵牟縣令胡孟虎訪於寔大遂復細民上納之法寔大紀其事於碑

陳之騷攸縣貢生博覽羣書為文淵雅從遊之士

若衡山譚吏部尚箴暨弟尚笏桂陽郭遠皆有文
名

郭金門善化人父嘉言慷慨好施以故金門寒苦
力學工詩文領康熙甲子鄉薦巡撫丁思孔聘為
嶽麓書院山長以義理相切劘受業者科第相望
任榮河令致仕歸

黃文憲字千頃善化人雍正癸卯鄉薦孝友端方
家甚貧一介不苟嗜古力學工詩文後進多所造

就與修省志甫竣以疾卒時論惜之

衡州府

唐李寬明一統志衡陽人元和中始於尋真觀創石鼓書院以為讀書之所刺史呂溫有詩

五代歐陽彬衡山人博學能文詣馬氏求謁不遂乃入蜀獻獨鯉朝天賦王悅擢居清要其後官至尚書左丞相出為夔州使喜曰青山綠水中為二千石豈不美哉

舊通志

宋李士真衡陽人至道中會境內儒流講學於石鼓

書院重加修建得上聞賜額

舊通志

黃照隣姓譜桂陽軍人祥符間舉進士仕為職方郎中嘗讀書於郡西芙蓉山石林亭鄉人號為職方巖子植元熙二年進士官朝請郎知貴州

葉蓋楚紀耒陽人熙寧中試才難賦魁上庠後知郴州

秦噩楚紀衡州安仁人嘉定十二年登劉渭榜進士

深於理學號南澗先生

侯宣明一統志衡山人少遊四方還家築室道旁俾
遊學之士往來館焉行之二十年曾無倦意遠近號
曰侯家書院

尹沂姓譜鄆人積學好古嘉定中建臺山書院延明
經以教邑中俊彥置田百二十畝以供祀事贍生徒
一時士風丕變

陳敬叟姓譜臨武人博學能文咸淳中進士授耒陽

學錄後解歸高隱肆力於詩文有巽溪集行世

元陳楚春臨武人至正中授長沙教諭順帝在道州
楚春為詩上之有紅日馬頭天已近青雲鴈背雨初
晴之句帝曰此等老儒宜大用之乃居此職及北還
御極以楚春充扈從官至京命賦神州八景稱旨擢
湖南廉訪使

舊通志

何克明楚紀衡山人元延祐丁巳中湖廣鄉試第一
所為雲夢賦為世傳誦

明寧咸衡陽人自少即能為古文詞肄業成均志在講學嘗講其學軒以處生徒所著有易編論語類補全楚會錄說輟稿舵樓閣記嘗作功名論謂人世所說功名實富貴耳又居其所後父母之喪作為人後論難益其學有本云

舊通志

王萬善衡陽人嘉靖辛酉鄉試第一志意高遠淡於世味聞新安陳弘忠講心性之學遠道詣叩歸坐一室覺方寸泓澄欣然有得也同遊者慕其冲和比之

黃叔度

舊通志

皇清鄒章周鄆縣歲貢生孝廉統魯之子通涉經傳與
周士儀修衡州府志及分修湖廣通志又輯臨武
志母喪廬墓病卒

鄒定周鄆縣歲貢生章周之弟與兄俱以孝友著
聞為東安訓導刻銘黌舍誘掖甚勤

譚瓊英衡山人歲貢生嫉明中葉以後理學不明
人喜詆毀程朱訟剽子書以駁為奇以僻為奧與

子弟講學論文一出於正邑議徭賦及有興建令
長皆委信之實其素行允孚云

彭齡字小鏗衡山諸生少通五經尤精春秋學淹
貫三傳折衷於程伊川胡文定斥春秋繁露為贗
書所批閱不下數十家性恬淡恥事干謁勤於教
子晚歲猶日摘經書疑義反覆解說喜吟咏曠然
有絕塵想駉園集其一鱗也詳衡山縣志年七十
一卒

蕭士熙衡山諸生幼警敏涉獵經史能為詩歌古文詞衡州府及衡山縣志多出其手

周命圭士儀孫康熙庚午舉人少孤母勵苦節命圭以教授所入奉養其母通經學善成就後進云戴日煥字晉元衡山諸生博極羣書為文雅慕歐曾老猶勤學足跡罕入城市所著有衡山縣志

王啟衡陽歲貢生孝廉王夫之子年三十始應試為詩文高卓敦尚氣節督學咸器之修府志垂成

卒

文之理字玉山衡山諸生屢試冠其曹古文辭典
瞻中具有風骨立品端方接引後學諳如也

永州府

唐史青姓譜零陵人博聞強記開元初自薦云聞曹
子建七步成章陛下若試臣願五步之內可奉詔日
試萬言臣願足矣試昭君怨歲除詩明皇大稱賞授
左監門衛將軍

覃季子祁陽人柳宗元集覃季子生愛書貧甚尤介特不苟受施讀經傳言推太史公班固下到今通為書號史纂又取鶩老管莊子思晏子下到今其術自儒墨名法凡有益於世者為子纂黜陟使其書以氏名聞除太子校書

五代何仲舉姓譜營道人母嘗夢仲舉入月尋與范質同登後唐長興間進士因賜所居鄉曰進賢里曰化龍仕終天策府學士

宋歐陽程楚紀營道人少貧為郡吏郡後有池常淬鐵為戎器名鐵作池植亭其旁一日太守於吏牘間得副紙紀池之勝有寒影倒吞臨漢樹冷光高浴半天星之句問知為程語大驚異之與之金使歸為學登太平興國八年進士累官屯田員外郎

蔣敏修姓譜營道人十五遍讀諸經子史其父璨命作無絃琴賦立成人異之既長以文名元豐間登進士仕桂州理刑掾有文稿三十卷

唐人鑑姓譜字德明零陵人好學能文楊誠齋始至
即與納交一日誠齋假香爐以問卜人鑑以小詩送
之曰聞藝香爐要決疑不疑何用卜著龜聖人自有
韋編在進退存亡豈不知誠齋得詩大嘉之後築室
於州學之西植竹萬竿誠齋名玉立齋

樂韶楚紀字成之零陵人穎悟絕人讀書五行俱下
十歲能屬文弱冠登第授桃源尉

嚴昌裔姓譜字慶會零陵人性沉靜張浚謫永州昌

裔登其門而受學焉子栻與相友善

義太初楚紀字冲遠營道人厥考宗濂溪之學以廸
太初太初學知本源登淳熙戊戌進士從朱文公遊
深有所得楊誠齋趙端明皆器重之

張紆楚紀樞姪字公飭性高潔嘗遊紫巖先生門與
南軒為友

吳倫楚紀字子常零陵人受業於南軒南軒之帥江
陵也倫從之及易箴倫在其旁乃曰蟬蛻人欲之私

春融天理之妙益以告倫也

蔣復字汝行零陵人博涉書史隱居東山介然自守
非其交不與也與吳倫同受業於張栻門下有澹巖

遺稿藏於家

舊通志

唐徹楚紀字子卓零陵人績之族人也謁劉靜春先
生授以近思錄學益進歷官廉慎

唐復楚紀字子立零陵人徹之弟也受學於呂東萊
之門號敬齋嘉定甲戌進士為衡陽尉

何友蘭道州人嘉定四年進士歷官至大學士後歸里理宗御製七言古風一章送行復賜書營川漁隱四字

舊通志

吳必達楚紀字材卿道州人以詩義薦名淳祐元年進士第一授建康府教授七年擢奉議郎尚書禮部架閣兼給事中借紫金魚袋

元鄧桂賢字國望零陵人少聰敏好學大德間任本路儒學選潭州路學正不赴說經授徒特穆爾常師

事之延熹間編集郡志成鑄先聖廟祭器樂器有功

學校

舊通志

文均範東安人少聰敏善屬文詩有唐調至正時被

徵不起

舊通志

張韶明一統志道州人以明易經舉於鄉累官朝列

大夫海北海南宣慰司都元帥府僉事

明文明東安人秉性友愛雅志正學生徒受業無間

遠邇成化十六年貢太學不樂仕進常獨處養謚略

無情容晚年尤好學不倦

舊通志

于材楚紀寧遠人成化戊戌進士選翰林院庶吉士授編修天資高邁學問該洽

謝思申祁陽人領嘉靖癸卯鄉薦私淑陳白沙從學湛若水羅洪先嘗著聞見錄每所聞嘉言懿行必書之

舊通志

呂學簡零陵人家貧嗜學工古文辭領萬曆辛卯鄉薦授澧州學正癸卯以禮經分校貴州陞南部令歸

構六清亭說廣拙編栩栩夢語

陳貞祁陽貢生性孝友制行端方工為詩文教授里中生徒甚盛萬厯己未纂修府志一時最稱博學

易三接零陵人性剛介高自期許著零陵山水志有

暇齋諸集

以上舊通志

皇清陳禧零陵人歲貢生少以淹博著聲尤精於易垂老兩目眊昏日集生徒講解指畫娓娓不倦人咸以耆宿奉之選湘潭訓導尋卒

王渥零陵人以歲貢生選長沙訓導年老未赴卒
渥孝友嗜學家塾教授具有槩範

寶慶府

明車萬合大任之孫天啟辛酉舉鄉試第一高潔

長於吟咏以閑為宗

舊通志

皇清王元復邵陽貢士其學究心於皇極經世書洪範
內篇律呂新書皆有新得之義善啟誘後學湖南
八士尊師之

岳州府

宋羅孝芬楚紀平江人字廷颺宣和間登進士甲科
仕吏部郎中靖康初致仕歸

李儒用楚紀字仲秉平江人登嘉泰壬戌第歷官制
幹時朱子寓岳麓儒用受業於門醴陵闕獵為制置

使宣諭蜀中辟幕下薦其人品經術可以大用未幾
卒所居練溪學者稱練洲先生

李杞字良仲平江人朱子門人有池州語錄

李雄楚紀字伯英平江人年二十客臨安遇蔡元定
導以見文公遂受業於門與黃直卿康叔臨蔡伯靜
及其弟仲默講貫明徹具見語錄雄博學貫通尤有
志於當世星緯占候孫吳兵法咸詣其妙時黨禁嚴
諸賢貶斥異地或徙或死雄徒步赴之曲為料理後
其學盛行從遊者甚衆創陽坪書院居之學者稱陽
坪先生

鄒輓楚紀字行之平江人安貧樂道人咸重之朱晦

菴往長沙道經平江輓謁之教以歸取四書讀之於
立身宅心體察久自有得歸讀論語稍有悟處乃曰
古人為學只是實學工夫學以為已豈但如俗儒詞
章專事利祿哉卒之日棺衾皆出友人方叔行云
毛友誠楚紀字伯明平江人聞康叔臨傳程門學寓
已陵從之遊謝棄科舉闔戶讀書尤邃於易教誨後
進不倦

方輓楚紀字叔行平江人資稟凝重李弘齋教授岳

陽輓慕紫陽正派師之返弘齋誨以詩曰博文約禮
終身事修已治人種德書好把從頭親切看若非親
切總成虛輓自此謝棄科舉從事根本之學輓生平
未嘗疾言遽色家庭雍睦子弟肅恭魏了翁名其室
曰學齋

許應寅姓譜平江人與弟應廷有文名同登紹定二
年進士應寅尤以操行著

嚴鉤華容人進士以詩名家與安陽韓琚齊名應試

有鴻鴈來賓賦一時傳寫蚤夭當世惜之

舊通志

元方敏中巴陵人年十二通經書春秋義潛心嶽麓
遺教書其室曰自明軒從遊者教以克己為要高尚
不仕見臨川江漢叙錄

丁濬字國器巴陵人以鄉貢授河南通判遷鞏昌同
知為人重厚質實自少至老敦行不怠鄉族重之居
官守已臨民皆有法進四品服俸卒

李用庚平江人遊太學以舍法釋褐同年毛養齋客

死用庚率鄉士經理後事纖悉靡遺教諸生知世務
期於有用是時宰平江者莫不重用庚風誼用庚介
立未嘗一言與邑政

以上舊通志

鞠志元楚紀巴陵人至順癸酉會試中書省試蒲輪
車賦號為雅贍至元間官宜都令按舊通志作鞠志
誤

明嚴承範華容人正德戊辰進士博學工詩與永濬
稱大小嚴授戶部主事甫七月告歸以著述自娛有

青湖集

程宗舜華容人嘉靖辛卯舉於鄉事母袁氏以孝聞
刻意著書至忘寢食垂二十年有洪範淺解律呂或
問

楊熹臨湘人性至孝篤學慎行潛心理學舉明經不
仕從遊者屢常滿戶外

朱潮岳州衛人談理學清修篤行嘉靖初為大禮議
力主為人後之說

范鍾臨湘人少篤學善吟咏中嘉靖壬子鄉試官邵

武同知以父母年八十告歸

以上舊通志

皇清方之玠臨湘人明經未仕所著有禹貢山海經圖

注孟子集語

舊通志

鍾正章字漢雯平江人幼耽書史兼精楷法嘗以
琴自適視一切世味泊如也已卯領鄉薦益留心
濂洛諸書所著詩文甚富年六十餘卒於家

常德府

南北朝黃閔楚紀武陵人博學善屬辭嘗撰沅志精麗可紀唐章懷太子為郡國志多採其說

伍安貧明一統志武陵人博雅嗜學梁累降元纁之禮皆以疾辭嘗撰武陵圖志

宋楊維姓譜武陵人登嘉祐進士第幼穎悟工詩神宗朝進宮柳詩百篇上大稱賞御書清白傳家四字賜之

楊枋 楊岳姓譜號存齋武陵人弟岳號字溪嘗師

朱晦菴友其門人晏敦復所得益深世稱大楊小楊
明蔣信姓譜武陵人少為諸生貧甚郡守憐之令捧
詔適屬縣例得餽贈為助信一無所受王守仁謫龍
場寓武陵講學信雖與之遊而卓然自異不盡是姚
江之言貢入南雍祭酒湛若水俾主諸生教學事嘉
靖戊子舉應天鄉試壬辰舉進士歷官貴州提學副
使

冀元亨姓譜武陵人正德丙子鄉薦幼有志操每以

古人自期待對妻子如賓率族人以正為學務探本源不為口耳之習學者稱之

唐相武陵人與蔣信為同年友而師事之潛心理學

樂道不仕

舊通志

辰州府

明馬元吉沅州人嗜經史邃理學由助教遷長史歸隱明山十餘年

楊東煥沅陵人學粹而有文生徒甚衆列膠庠得甲

乙榜者共百餘人

以上舊通志

直隸澧州

唐李羣玉楚寶字文山澧州人詩筆妍麗斐休廉察
湖南厚延致之及為相以詩論薦羣玉乃詣闕進詩
三百篇制詞曰李羣玉放懷邱壑吟咏性情孤雲無
心浮磬有韻吐妍詞於麗則動清律於風騷冥鴻不
歸羽翰自逸霧豹遠跡文彩益奇信不試而愈精能
久幽而獨樂念其求志可以言詩用是繫維俾之刊

校可守弘文館校書郎以著詩三卷後集五卷

宋蘇庠姓譜澧州人以詩名蘇軾一見比之唐李白
自是詩名藉甚時當路者餌以美官庠笑而謝之卒
年八十餘號後湖居士有文集行世

皇清于登俊澧州人順治戊戌進士令江南清河恩餘
於威民懷之登俊通覽羣書解組歸里年近耄老
猶誦讀不少懈

龔其遇澧州歲貢生好讀書其文詞近雅州舊志

多出其手

直隸郴州

唐孟瑄韓愈送孟秀才序今年秋見孟氏子瑄於郴年甚少禮甚度手其文一編甚鉅退披其編以讀之盡其善無有不能吾固心存而自識矣其十月吾道於衡潭以之荆累累見孟氏子焉其所與偕盡善人長者吾益以奇之姓譜元和中進士嘗著嶺南異物志

宋陳純夫明一統志永興人元豐初監舉第一尋以
易經魁省試累官通奉大夫後居鄉以文自娛

姚宋佐明一統志靖康間其父寓郴生宋佐少嗜學
舉乾道進士初調澧州掾再任校官以詩名性廉介
家極貧自號北湖有文集

曹肅姓譜字士先郴州舉鄉薦授寧遠簿平生安分
守道四方學者多從之遊著述數十卷尤工於詩子
延祚字熙載清修多學足不履城市

李邦聚字仁叔興寧人咸淳二年試禮闈第一官翰林學士于鵬飛舉於鄉俱以文學稱

州志

直隸靖州

明楊正恒綏寧人弘治乙丑進士嗜學安貧鄉人範之

馬應乾靖州人嘉靖壬午舉於鄉性明敏有風操家

徒四壁意到境會吟咏清越

舊通志

湖廣通志卷五十七

欽定四庫全書

史部

湖廣通志卷五十八

九

詳校官監察御史

臣陳化龍

檢討

臣德生覆勘

總校官知縣

臣繆琪

校對官助教

臣羅萬選

謄錄監生

臣李觀光

欽定四庫全書

湖廣通志卷五十八

人物志

隱逸

武昌府

晉郭翻晉書列傳字長翔武昌人少有志操辭州郡
辟舉家臨川以漁釣射獵為娛居貧欲墾荒田先立
表題經年無主然後乃作稻將熟有認之者悉與之
縣令聞而詰之以稻還翻翻不受嘗以車獵去家百

餘里道逢病人以車與之徒步歸其漁獵所得或從
買者便與之不取直亦不告姓名咸康末乘小船歸
武昌省墓安西將軍庾翼往造欲強起之不從又以
其舟小而狹欲引就大舟翻曰使君不以鄙賤而辱
臨之此固野人之舟也翼俯屈入其舟中終日而去
李廞字志字宗子江夏鍾武人祖康泰州刺史父
重平陽太守世有名望廞好學善草隸與兄式齊名
廞疾不能行坐嘗仰臥彈琴讀誦不輟河間王辟太

守掾不赴後避難隨兄南渡司徒王導復辟之廡得
賤命笑曰茂弘乃復以一爵假人卒不往

南北朝郭希林南史列傳武昌人曾祖翻晉世高尚
不仕希林少守家業徵召一無所就子蒙亦隱居不
仕

胡叔江夏人居蒿室草徑惟酒自適嘗謂人曰我
生澹泊似勝焦先不治生產饑貧不以為恥養子曰
螟蛉以自隨恒乘一犢牛布囊容三四升飲噉醉飽

取其餘肉以付螟蛉

舊通志

宋杜淦明一統志江夏人自稱漢陰老人居水濱戴笠躬耕嘗曰仕者忍恥耕者勞力皆大造之委蛇耳吾何心哉

李必大嘉魚人咸熙戊辰以周禮中第一授國子監學錄後歸隱不仕聘之作詩以辭有云曾上蓬萊第一宮夕陽留住且從容

邑志

程師德明一統志大冶人有才學善行不求仕進蘇

軾嘗與之遊

李昌國明一統志江夏人善於訓子有子三長康叔
河陽守次康年監丞善古篆與蘇軾黃庭堅遊次康
直左司員外郎休官歸里自稱裕老

程從龍字登雲嘉魚人少嗜學每夜讀書達旦不樂
仕進能詩環居栽梅酌酒而吟倚樹而歌號梅軒有

詩集行世

舊通志

元嚴士貞字正卿崇陽人嘗遊學棲息廬山博通子

史尤嗜仙書善詩文作崇陽志有梅谿百詠集

嚴靜山字紹安武昌人與丁鶴年同學於南湖書院
耿介不阿隱而彌耀所居山水環抱故鶴年有出門
便有好湖山之句嘗自著雲谷緒餘稿

衛均執武昌人隱居南山自號白雲老人足不入市
廛能詩與丁鶴年嘗有詩往還

以上舊通志

明燕遺民字逸德江夏人累徵賢良不起登山臨水
嘯歌終日濡毫揮藻逸氣橫生

蔣義字志道崇陽人博通經史隱居不仕洪武十四年詔訪隱逸有司舉義應以老辭

鄔必信字迎賓武昌人少以母病求醫至江潁風濤驟作榜人不肯渡自前刺舟中流舟覆恍忽若有持之者得濟迎醫歸母病尋愈平生多隱德不肯言明末丁丑且百歲其孫進士明昌疏陳賜冠帶米肉表其閭倪元璐誌其墓

嚴方塘武昌人壽百歲子八十居喪劉仲叔書其閭

曰百歲人翁天下少八旬孝子世間稀

朱華園字淮仙宗藩也喜著述明末癸未夢遊異境見石壁有詩云飛泉如白鶴隱見渡平林暗壁流花辦漁郎何處尋即棄家遁入桃谿莫知所之

尹珩字右玉大冶人有奇節為諸生與江夏賀逢聖遊以志操相砥礪壬午舉於鄉癸未賊陷會城泛宅寓吳門十四載自署河上旅餓每逢母難日勺水不入口一日挈家還里逾年卒

沈韻字四聲江夏人寇亂家屬多淪沒韻葬畢即棄
舉子業隱梁湖之孤山偕其妻鋤圃賣藥採野蔬自
給時時吟咏亦不存草足不履城市者數十載

艾然字木田江夏諸生與其妻偕隱結茅為居栽花
種蔬荷鋤而吟天趣自得

以上舊通志

皇清魏廷謨字溟一江夏諸生高才健筆意氣豪放談
論古今往往義形於色意所不投則不能強獻賦
將至奏記當事捍禦甚備不能用隱居著述癸未

徵修省志辭不赴年九十一卒

胡從化字內寧江夏諸生潛心理學內行淳備工文章不求聞達其父富喜誦擊壤吟併祀堯夫像從化亦如之名其居曰邵窩子鳴臯另傳

李雲從字能白諸生世居大冶之黃石磯築室江干手植花竹課讀其中凡義倉義冢津渡藥餌賑饑濟貧諸事靡不樂為之方伯徐惺重其行誼邀與相見辭不赴

以上舊通志

漢陽府

明蕭遜字于敏漢陽人父

闕

生子四遷運皆以俠顯

達為諸生有聲遜獨隱居自遠敦大方正王太常秩

張民部緒皆敬其醇德孫鳴甲登進士官河南布政

使司

舊通志

鄒謙所孝感人清貧有操守攻古文詞士執經從之
戶外屨滿有司上其事徵為邑博士固辭大學士楊
士奇贈以詩曰贈爾淇園綠玉竿臨岐苦嘆別離難

邳城民俗從來厚但守清風到歲寒

邑志

廖應魁漢陽人混迹市廛留心詩史楚藩爭漢口地
課甚橫應魁挺身以辯人稱其勁直

熊士奇漢口鎮人性慷慨不吝施予貧者貸以無償
或質子女田宅輒焚其券曰無以小利析而骨肉孫
徵泰壬午孝廉

袁楫字汝濟漢陽諸生幼與蕭司成良有併號奇童
晚與王章甫為意氣交當倭陷朝鮮時士爭以談兵

自見章甫微諷楫楫以書謝之遂終隱焉

鄭鸞黃陂人精周易俗尚乾竺教作歲俗論以規孺
慕至老不衰作風木篇

陳銘字公警黃陂人恥以文字干時棄舉子業從王
龍溪羅石蓮遊田廬僮僕佳者悉畀其弟自處泊如
也壽九十一終

章煥然字素夫黃陂人請業於黃竒士得探微旨黃
曰吾道有人矣學使葛屺瞻亦稱其沉靜後領歲薦

隱居不仕

以上舊通志

皇清陳其棟字雷南黃陂人少嗜學博通經史以先儒存誠主敬之論為養心進學之本結廬山中邑宰聞其賢請賓鄉飲者三著有姓氏補等書

舊通志

黃州府

唐李玘黃梅人開元中一日明皇夢廬山使者請立廟詔刺史獨孤正命所在學士製碑文獨玘文稱旨詔舉博學宏詞不就築室東山麻林之窪讀書樂道

稱衡門居士以老

舊通志

宋林敏功明一統志蘄春人以春秋舉進士下第杜門不出者二十年博通五經尤長於詩元符末詔徵不起賜號高隱處士弟敏修亦不仕終老以文字相友善世稱二林

張慙子麻城人隱居九螺山自稱九螺山逸人東坡志林所云黃州故縣張慙子行止如狂者也熊吉贊云內史之慙以閑其君惟子之慙獨成其身龍德而

隱今鮮其人九螺之山因子益名

王翊麻城岐亭人建桃黃菴自號桃黃山人熊吉贊
云桃黃之菴中有隱君尸居蔬食抱樸含真匪道曷
依匪道休行孰無懷氏葛天之民

黃省翁失其名黃梅人寡嗜慾好雅歌恬飲咸淳間
已百歲遇異人授以藥謂食此可再周甲子至一百
六十歲省長三寸垂兩顴故人稱為省翁

舊通志

梅國淳字作所廣濟人工詩賦肥遯林石宋亡武昌

程平章薦之屢聘不起謝之以詩

元楊俊字仕元黃梅人初為博士弟子厭之遂棄去
覓石龕古磔山中優游偃仰一百三十歲卒

何朝舉廣濟人有志操師事饒雙峯養志巖阿不樂
仕進著有文公性理吟一編

明吳榮一黃岡人洪武初棲中和石壁山種蔬養鶴
博覽豪吟抗志巢許嘗荷鑱斲藥濟人

商顯黃梅人雅好詩書永樂二年徵至京固辭不仕

賜號樂耕徵士翰林張和美作寒江歸隱圖賦詩送之

甘望魯麻城人幼為人牧奮志攻苦研窮程朱之學卒成名儒以黃陂有二程望魯臺因以自號

毛鳳起字瑞東麻城人少習制舉業後棄之講學授徒嘉靖壬辰詔舉賢良敦行遺逸之士有司以鳳起應不就

朱紳字懋孚蘄州人居田野自食其力牛背夕陽卷

冊相隨憑弔古今時人莫窺其際

柴大楠蘄水人磊落英奇弱冠棄家遠遊塞外涉混
同鴨綠諸境晚歸傍巖溪築一洞不盈丈隱居四十
餘年讀老易諸書足不出戶

柴杰蘄水人博學有隱德每坐竹林中讀書竟日於
書無所不窺尤精於易與兄木友愛最篤析田廬為
四一子與三姪均每戒子云知事宜少識人毋多饅
粥外有餘則去之不可以田產累子孫也

劉養微字敬伯廣濟人性澹泊工詩將卒賦詩云辛
苦人間百未休今朝忽作等閑遊玉樓作記非吾事
一枕空山明月秋

劉秉錄字昇之廣濟人事孀母孝母卒哀毀年四十
妻喪不復聚有僕久役於家知其先嘗為士焚契遣
之隱居授徒以明經終子洪芳詩文蚤歲有聲孫醇
驥最知名

樊志張字兩同玉衡次子隨父戍雷陽二十四年及

玉衡歸卒志張一慟幾殞遂不應鄉舉潛心易學著
易象易數易適易占益王遣使再聘皆不就

袁希變字子理黃岡人幼嘗和李本寧宮鶯白鶯詩
各十章本寧大器之已而與三袁唱和又與俞羨長
錢仲舉贈答於金陵遊跡幾半天下歸隱茅山之麓
結茅曰遯園以著作娛老

黃可久字柳溪蘄水諸生甘貧力學與妻偕隱臙脂
山下精丹經內典醫卜諸書每瞑目默坐自號出塵

道人子正色明末丙子舉於鄉

汪三奇字亦常黃岡諸生貌古心樸明末癸未寓居
鄂城死於賊所著易假書信詩志禮足春秋懼諸書
俱燼無傳

易為鼎字用玉黃岡人生而有文在手曰汪號汪來
子蚤以文章氣節著明季學使高世泰修三楚文獻
錄鼎與汪三奇劉醇驥皆與焉亂後棄舉子業築室
白雲山授徒以老

王臨字泰生廣濟人家貧力學不輟闖賊至見臨獨
坐大松樹下執卷微吟賊魁梁廷柱素知書其婦能
讀孝經夜燒大炬出所挾書與相質天明揖臨去後
因江行避雨得邑殘志於村店攜歸修輯成書又嘗
作禹貢圖及河圖考等書

寇學海字巨源廣濟人少業儒而任俠好為詩嘗獨
往廬山白鹿洞數年鍵門取魏晉盛唐諸詩冥會之
時稱寇山人

梅之煥字惠連少司馬國正子明末亂起棄襲廕散家財歸隱囊山為僧別號槁木以著述自娛

陳鴻思字大壑黃岡人萬曆丁酉舉人歷官貴州太守所至有政聲後退居林泉手一編不輟以老

洪周祿字半石黃岡人天啟壬戌進士知常州府解綬歸里肆志詩文行草書妙絕一時急難好施鄉里德之年七十餘卒

程師泰字交甫黃岡人懷宗庚午舉人累官蘇州知

府以疾告歸好吟咏書法直逼大蘇家貧問字者餉以酒即用欸客談論竟日年八十餘卒

韋克濟字孝忍黃岡人明季進士授南安令以誠格巨猾邑人賴之丁艱歸遂隱居武昌賢庾鄉率諸子躬耕自給

李之泌字鄴仙黃岡諸生精大易研理程朱不為王弼京房之學絕意仕進以長桑終其身嚴氣正性對卿士間閉目袖手端坐不一語督學徵之不起與才

人何履仕齊名時稱何李

吳人王字穉圭廣濟諸生為文淵古浩博著述甚多
性至孝善卜筮預知吉凶年七十自置棺題曰逸我

亭 以上舊通志

皇清姚應巍字德升黃安諸生刻苦食貧冬月讀書以
木棉擁足常達旦授徒羅山羅似南劉海宇亟重
之有紉袴子頗怠業巍責罷棄之空歸曰安能以
阿堵物誤人子弟舉鄉飲辭不赴子觀性耿介類

其父以歲薦徒步入都中表某官永年令遣騎強
邀入署信宿即行一無所取

舊通志

胡來通黃岡人年十二僧見之曰此人間百歲翁
也性好施與明楚撫魏光緒曾表其廬順治庚子
壽百歲僉謀建坊通力辭之忽一日沐浴更衣端
坐瞑目而逝

李奇觀字巨海廣濟人孝友質行鄉人化之當明
末寇擾歲荒兇人倡亂里中立守望營保障衆推

李公長者請為帥事平杜門著述授徒為博士弟子者百餘人姪必泰甥金德崇德嘉皆出其門

陳定中字大馬廣濟人明季棄舉籍隱於醫結茅湖曲柳陰承顏奉母以耕釣終其身

以上舊通志

安陸府

漢漢濱老父後漢書列傳不知何許人桓帝延熹中幸竟陵過雲夢臨沔水百姓莫不觀者有老父獨耕不輟尚書郎南陽張溫異之使問焉老父笑而不對

溫下道百步自與言老父曰我野人耳不達斯語請
問天下亂而立天子耶理而立天子耶立天子以父
天下耶役天下以奉天子耶昔聖王宰世茅茨采椽
而萬人以寧今子之君勞人自縱逸遊無忌吾為子
羞之子何忍欲人觀之乎溫大慙問其姓名不告而
去

南北朝郢野老衡陽王義季都督荊州嘗出獵於郢
野老被苦而耕義季命左右逐之老人曰盤於遊畋

古人所戒方今陽和布氣播穀之始一日不耕民失其時奈何以從禽之樂而驅斥老人非勸農也義李止馬曰賢者也命賜之食老父對曰苟不奪時境內之民皆飽矣王之食老父何敢獨受其賜義李問其名竟不言而退

舊通志

唐陸羽唐書列傳字鴻漸竟陵人初不知所生或言有僧得諸水濱畜之既長自筮得蹇之漸曰鴻漸於陸其羽可用為儀乃以陸為氏名而字之隱苕溪稱

桑苧翁性高潔不樂仕進嘗詔除太子文學不就雅嗜茶善品天下泉味著茶經三篇言茶之原之法其後鬻茶者至陶羽形真煬竈間祀為茶神

明譚學字訥菴隱居授徒嘗袖其詩過譚元春元春為選而梓之名姓遂聞遠近年近耄猶吟咏不衰其卒也元春哭以詩

舊通志

王大韶字叙之京山人少負逸才工詩文隱大月山間田數百畝躬耕食之性閒放所居雜植花竹蕭然

有以自樂慕冀缺梁鴻之為人嘗以自況後以子格
貴贈河南僉事

王宗華字時藻京山人隱居斗山種松數百株結廬
其下旁有雙泉引為蓮塘可數畝許躬耕高尚邑令
請見辭不出年八十卒李宗伯維正誌其墓稱為太
平逸叟

盧楚傑字西陵鍾祥人萬厯丙辰進士博雅淹通文
名譟一時徜徉山水間詩酒自放稱荆臺高士

姜迪字伯阮天門歲貢八歲能屬文舉神童日記數
萬言年十二工詩賦先達鍾惺譚元春共竒之五中
副榜不遇舉明經杜門著述以老

李世芳字叅嶺鍾祥人明末癸酉鄉舉讀書山寺經
年不履城市與人相對有蕭然物外之致值流寇亂
避匿深山賊慕其名強以官堅拒不受

魏士茂字卓如天門人廩使士前之弟少負才名試
輒冠軍喜恬退著書華嚴山房應貢不赴鄉里皆高

其行

以上舊通志

皇清鄒元芝字殿生天門人號三澁漁人明末戊寅間
至江夏九峯山寺讀書五六年其家弗知也督學
堵應錫首拔食餽性恬澹不樂仕進著有三澁先
生傳卒於家

吳驥字既閑天門人兵備文企嗣子懷宗庚午舉
人性孝居喪哀毀骨立雅工詞翰而怡情邱壑以

高隱終

以上舊通志

德安府

宋令狐揆卜築湓溪之南嘗雪中跨驢入城詣張君
房借書令小僮攜簾負琴帛繒暖帽委轡長吟曰借
書離近郭冒雪渡寒溪布衣林逸善繪因作令狐揆
雪中渡溪圖

舊通志

明蔡乾庵逸其名德安人以理學稱郡人皆嚴憚之
讀書郊外之廣心堂適積雪累日楊方伯芷往跡之
戶無人迹正襟危坐自若人稱曰乾庵先生

安大危居雲夢曲水湖博學嗜古負笈從遊者踵相接稱爲曲湖先生正德末夜觀列宿驚異曰帝星明於江漢其應在安陸州逾年世宗從興邸入承大統危偶疾卧猶倚床取隙光執卷披覽曰人以藥治疾吾代以書年百歲卒

高致中字南洲安陸縣人不求仕進放懷山水間伺司寇遷予告歸里時嚴嵩秉國爲詩郊餞何歸榜其幅於堂一日過之何未出致中題其上曰椒山已死

洪塘謫天下何人是介翁今日登堂覽詩草始知公
度實能容平生高致大率類此

徐進可字南征應城人舉天啟甲子鄉試為人方介
嘗以邑中賦役繁重同紳士請於當道行均役之法
鄉里賴之恬於仕進以壽終

以上舊通志

荊州府

南北朝宗彧之南史宗少文傳彧之字叔粲少文從
父弟家貧好學性行真澹徵辟一無所就宋元嘉初

太史陸子真觀採風俗三詣或之每辭疾不見告人
曰我布衣草菜之人少長壟畝何宜枉軒冕之客子
真還表薦之不就

宗測南史宗少文傳測字敬微家居江陵少靜退徵
參軍及太子舍人皆不就欲遊名山乃寫祖少文所
作尚子平圖於壁上測長子賓宦在都知父此旨便
求祿還為南郡丞付以家事齋老子莊子二書自隨
往廬山止少文舊宅魚復侯子響為江州命駕造之

測不見後子響不告而來測巾褐對之竟不交言刺
史隨王子隆至遣別駕宗忻口致勞問測笑曰貴賤
理隔何以及此竟不答測善畫自圖阮籍遇蘇門於
行郭上坐卧對之好音律善易老續皇甫謐高士傳
三卷著遊衡山廬山記又有宗尚之字敬之亦好山
澤徵辟不應

劉凝之

詳鄉賢志

唐楚江漁者明一統志不知姓名每得魚換酒輒自

放歌不言姓名江陵守崔鉉問曰君之漁隱者之漁
耶漁者之漁耶對曰姜子牙嚴子陵皆隱者也不釣
其魚釣其名耳遂鼓楫而去

宋孫諭明一統志江陵人元祐末挂冠與時同退休
者吳師道梁宏朱光復賈亨彥張景達布衣唐愈為
七老會五日一集時人榮之

李堯言明一統志江陵人熙寧中除侍御史未七十
上印綬其兄立言亦自澶州納政時又有李疎引疾

里居郡人語曰元豐濟濟稱三李一瓢樂在其中矣
唐恕宋史唐介傳江陵人孫恕崇寧初為華陽令以
不能奉行茶法忤使者謝病免歸其弟意方為南陵
令亦以病自免兄弟杜門躬耕靖康元年御史中丞
許翰言其高行詔起為監察御史意亦宰相吳敏薦
召對而貧不能行竟餓死江陵山中

文範荆南人家邑西高沙湖不樂仕進黃庭堅贈詩
曰不趨吏部朝中板且膾高沙湖裏漁

舊通志

何參夷陵人居篤學坊性孝友博學多聞不求仕進
人稱曰處士

元陳伯通峽州人少有籌幹為中大夫伊德呼公所
器重勉之仕遊深山中至正間盡以家世所餘給族
黨之貧者隱居教授鄉里化之

以上舊通志

明劉世英洪武初以文學名於世潛德弗耀不干仕

進

舊通志

范希良松滋人舉嘉靖癸卯鄉試一上春官不第遂

絕意仕進足不至公庭所居敞陋彈琴讀書自樂世號為水南先生

劉魁

詳鄉賢志

靳相居江陵之草市家貧未娶課童蒙數十日晡即下簾讀書友人為卜室不數年妻卒遂不復娶躬爨以養親親歿因潛於家不與俗往來時人每勸之仕不應年七十餘卒

孫誦字九巖別號長嘯道人棕笠蒲團往來山水間

嘗製邵康節像自隨又云安樂子

闕

檳號鶴池沙市人蕭然高寄不務生產有古隱
君子風年八十一卒子養心領鄉薦成進士為名御
史

曹儀庭號高尚江陵人諸生遯跡田圃間閉戶不見
貴介俗人究心河洛康節之學讀書徹夜不輟每語
人曰荊州空陳執中人未有喻之者及壬午闖賊陷
荊時知府乃陳執中也事孀母王氏曲盡孝養訓孤

姪如子鄉人有為不義者咸畏其知

以上舊通志

皇清陳丈人居夷陵之沙地坡有隱德順治初年百有四歲目明耳聰步履甚健遠安令周會隆安車延之詢其所得曰知事遲回頭早耳予之錢弗受聞其尚田於縣界因免其一家之徭

舊通志

襄陽府

漢龐德公後漢書列傳南郡襄陽人居峴山之南未嘗入城府夫妻相敬如賓荊州刺史劉表數延請不

能屈乃就候之因釋耕壟上妻子耘於前表指而問之曰先生苦居畎畝而不肯官祿何以遺子孫公曰世人皆遺之以危今獨遺之以安雖所遺不同未為無所遺也表嘆息而去後攜妻子登鹿門山采藥不反襄陽記諸葛亮每至其家獨拜床下公初不令止司馬徽與徐庶亦嘗詣之值公渡沔上先人墓呼公妻子使速作黍公還直入相就不知何者是客也子山民亦有令名為魏黃門吏部郎早卒孫渙晉太康

中牂牁太守從子統

楊慮楚國先賢傳慮儀兄也字威方襄陽人少有德行為江南冠冕州郡禮召諸公辟請皆不能屈年十七天鄉人號曰德行楊君

唐朱放字長通襄陽人隱於越之剡溪曹王臯鎮江西辟為節度參謀貞元初召為拾遺不就有詩一卷

行世

舊通志

鄖陽府

明楊春鄭縣舉人築室山中讀書力行不履城市性
厚重寡言笑嘗以琴一張酒一樽自隨欣然會意有
弄月吟風之概

劉俊初鄖陽人初不肯就試父兄強之遂領鄉薦一
赴公車歸遂終身逸居四時吟嘯性情常發於詩歌
中著有山居集藏於家

以上舊通志

直隸歸州

宋郭雍宋史列傳字子和其先洛陽人傳其父忠孝

學通世務隱居峽州放浪長陽山谷間號白雲先生
乾道中旌召不起賜號冲晦處士命州郡歲時致禮
存問後更封頤正先生令部使者遣官就問雍所欲
言備錄繳進熙淳初學者裒集程顥程頤張載游酢
楊時及忠孝雍凡七家為大易粹言行於世

明陳德芳施州人少聚生徒教授洪武四年明師伐
蜀德芳諷施南覃州隆降附以兵助攻瞿塘欲酬其
功固辭不受蜀獻王以卓行薦使者及門芳踰垣遯

去
舊通志

長沙府

唐戴簡柳宗元集譙國戴氏曰簡嘗以文行累為連
率所賓禮貢之澤宮而志不願仕與人交取其退讓
受諸侯之寵不以自大其離世與好孔氏書旁具莊
文莫不總統以至虛為極得受益之道其樂道與

宋王南美楚紀字乙道安化人隱伊溪桂嵒嘗置義
莊以給孤貧博通子史尤長於易遠近學者裹糧景

景從所著有釣月樓耕雲堂等詩賦

董南美楚紀湘鄉人少以文名不樂仕進東坡山谷嘗與之遊號碧廬居士

謝英姓譜字楚華寧鄉人讀書於石桂山博學好古聞岳武穆被害乃隱居山林教授子弟孝宗累辟之不就所著有志伊錄白雲稿循吏龜鑑

彭宗孟字尚英湘潭人隱居好學不求聞達尤深於易作易解吳獵吳旂序其書置之學宮漕使鄧汝謙

聞而禮聘之

見縣志

易元吉楚寶字慶之長沙人工畫花鳥及見趙昌畫
乃曰世不乏人遂遊荆湖搜奇訪古幾與獐狍鹿豕
同遊故口傳目擊之妙一寫於毫端又於舍後開圃
鑿池以亂石叢篁梅菊葭葦馴養水禽山獸伺其動
靜以資畫思尤善畫獐狍米芾畫學云元吉徐熙後
一人而已善畫草木葉心翎毛但以猿獐稱可歎

明李祁明列朝詩傳字一初茶陵人元統元年進士

應奉翰林文字母老就養江南授婺源同知遷江淞
儒學提舉司副提舉母憂解職歸隱居永新山中入
國朝力辭徵辟年七十餘卒遺文為雲陽先生集十
卷少師東陽祁五世諸孫也弘治中歸茶陵刻石表
其墓

洪倫攸縣人以諸生貢太學性剛直不樂仕進授御
史棄官歸隱其家四世同爨訖無間言

見舊通志

廖本祥明張治茶陵志成化中為社學師教誨有方

而作人之心懇懇有聲州庠者多出其門崇家禮闢
佛老洵儒家者流

瞿繼祖長沙衛人少負才名潛心經史中嘉靖甲午
鄉魁屢試禮闈不偶選永川尹不赴杜門謝客手不
釋卷簞食豆羹一介不苟扁其室曰心跡雙清壽七
十九自為誌銘竝逸民傳

楊廷相長沙人世居青山號青山攻苦力學博通經
史精天文地理性命元祕之旨中嘉靖壬子鄉試歷

上春官不第結廬晦跡足不履市廛所著有青山集
不傳於世萬厯中郡守吳道行修郡志廷相為作補
遺

鄆之馨湘陰人早負才名懷宗癸酉舉於鄉樸茂端
謹時稱古處焉

陶汝鵬寧鄉人懷宗癸酉以貢舉鄉試考選知州高
尚不仕詩宗漢魏書法晉人一時名雋咸樂交遊所
著有榮木堂集年八十三卒

以上舊通志

衡州府

東漢羅訓耒陽人隱居邑之樟檉嶺

見舊通志

唐凌倚馮贄雲山雜錄隱衡山往來自負書劍削竹為擔裹以烏氊倚既没山僧取以供事

廖融楚寶字元素衡陽人隱衡山與任鵠凌蟾王正己相友善正己贈詩有云鑪中藥熟分僧飯枕上琴閑借客彈又左司諫某贈詩有云積雨小舟橫別浦隔花幽犬吠深雲融不樂進取不苟勢利乃獨耽山

水其所自為詩清刻有致及卒刺史何丞矩葬之進士鄭鉉志其墓

王居仁常寧人與襲蓋卿同時嘗執經張南軒之門深有造詣登進士晚號習隱

見舊通志

侯宣姓譚衡山人少遊四方還家築室道旁俾遊學之士往來館焉行之二十年曾無倦意遠近號曰侯家書院

元侯應雷字春卿安仁人不就辟隱居山中以詩文

自娛所著有春山居士集年九十卒

見舊通志

明金良字玉相衡山人性雅淡不慕榮利年十八領鄉薦再上春官不第遂不復出徜徉山水間以詩文

自適嘗有詩云樵釣亦堪娛耕鑿聊自足百年駒隙

間何必計榮辱

見舊通志

李存明列朝詩傳字名遠更字仲公安仁人穎悟該博與貴溪祝蕃遠游上饒陳明遠之門三以高蹈邱園舉李祕書舉以自代皆不起洪武中年卒有埃菴

集

楊時榮字仁甫衡山人以戎籍中貴州鄉試作墅于
巾紫峯下名其山曰止山養晦自高不入公府事親
篤孝行誼修飭未嘗褻服見客山有白龍潭可溉田
躬耕其中曠如也

鄭祖明未陽人補國子生司成湛甘泉雅相器重歸
與邑人講論道學遂厭仕進遨遊山水吟咏為樂時
巡撫顧璘巡按姚虞副使李鳳翔相與唱和所著有

梅花百咏

以上舊通志

陳廷策三楚文獻錄衡陽人少孤且貧力讀書補諸
生文章有聲生平自檢甚嚴額其所居齋曰敬畏手
書偶云十目所視十手所指若此其嚴如見大賓如
承大祭只是個敬子宗契拜御史廷策與家約毋預
外事宗契嘗函一文穀為壽卒封識不啓食糲衣簾泊
如也萬曆丁未卒宗契方按兩浙聞父病馳歸猶張
目熟視徐咏曰兒歸事已畢老至死何辭遂舉手逝

李國相衡陽人領懷宗壬午鄉薦癸未獻賊陷衡徧
索薦紳強以偽職下令不赴者死國相引刀劈面示
不可用偽吏方羈縻聽獻忠令會獻忠入川得免徙
山谷築小室植桃數株臨池水人稱為桃塢先生

郭鳳躋字李陵衡陽人懷宗壬午鄉薦隱石仙嶺下
竹塢藥欄日吟嘯其中以自娛

以上舊通志

永州府

唐李季芳姓譜道州人代宗時處士刺史元結請於

朝曰李芳介直自全退守廉遜文學為業不求人知
乞令州縣造舍給田免其戶役從之李芳卒結又表
其墓

宋王繪 鄧璋楚紀俱零人有才名胡安國提舉湖
南學詔舉遺逸二人老不肯行安國疏命之官以勸
學者零陵簿稱二人乃范純仁客鄒浩黨也蔡京聞
而惡之抵以罪

蔣復姓譜字汝行零陵人受學於張南軒隱居東山

著澹岩文集

唐如晦姓譜字幼光零陵人博學無所不通山齋先生易板題其書堂曰善齋

明陳三績字玉几零陵人志行恬淡年十五遊於庠以歲例得貢棄去獻賊陷永聞其名招致之遁匿以免後栖雲莊山隱居終老

見舊通志

寶慶府

明張繼志武岡人篤學勵行善詩文萬厯改元詔徵

天下山林隱逸之士有司敦迫固辭不赴

劉春萊字芝侶武岡人少為諸生嗜學好古以性疎
放遂棄制舉業敏於詞翰操觚立就文不加點僻懶
箕跣不樂見貴介有逼就之者春萊舉身躍出窻外
竟折其足云

以上舊通志

岳州府

宋李黻字元明桃源主簿李冲虛曾孫幼而嗜學淹
貫經籍熙寧間朝廷始以經術取士黻深索理致究

聖賢指歸郡試遘疾慨然有山林之志葺所居為養
浩園性好吟咏慕元白體所著有兌齋編當時名流
如李康年輩皆與之酬唱鄉里就學者幾百人宣和
三年卒邑令雷抗為銘其墓

見舊通志

毛友誠姓譜字伯明平江人聞謝良佐高弟康叔臨
得程門學至巴陵從之遊謝棄科舉闔戶讀書尤邃於
易誘掖後進不倦時龔安國高其行誼延至領泮宮
幾十年李蟠教岳陽尤加敬禮有集曰玩易手抄既

沒岳陽祠之泮宮

方暹姓譜字明甫平江人初師李弘齋黃勉齋與饒伯輿張元簡趙思恕皆同門友元簡九江人嘗遺書曰伯輿明理而遠於事明甫見事而中於理吾嘗以斯道望伯輿而以斯世望明甫也淳祐間朝廷詔諸帥臣舉節行才識之士時孟珙帥荆湖董槐帥湖南皆以暹應詔明年特旨免文解一次暹辭不受珙復奏賜以處士名以示國家優禮賢才之意疏入未報而

遲卒學者稱為連雲先生

元胡天游楚紀名乘龍以字行平江人博學高志遭
元季亂遂抗志不仕養晦岩谷所著有傲軒集

顏耕道楚紀平江人讀書博古以詩賦鳴於世尤善
草書不樂仕進築室黃山號林泉野老卒年八十六
明周階平江人通春秋永樂初薦經明行修以母老
辭不就所著有井蛙遺響

方宗秩巴陵人通春秋一試不第遂歸隱淹貫諸史

尤善詩耕桑樵採自食其力析疑問字者多於隴畔
求之天順間知縣袁綱以經明行修舉不就

方良俊臨湘人苦志力學以選貢歷羅江教諭羅居
蜀萬山中林泉幽邃晏遊唱和無虛日遷魯府紀善
不赴所著有風景玉淵集十七史摘異併詩文若干

卷 以上舊通志

洞庭老人小草齋詩話卓彥恭月夜泊洞庭有老人
盪小舟過之歌詩云八十滄浪一老翁蘆花江上水

連空世間多少乘除事良夜月明收釣筒

譙謨姓譙華容人有才學能賦詩隱居不仕以吟咏自娛天順初遊京師石亨欲薦之乃逃歸鄉里邑縉紳學士咸禮重焉謨嘗集古梅花百韻至今傳誦

孫斯億三楚文獻錄字兆孺華容人年十四補弟子員久之上書督學棄巾襪袍着華陽巾渡江如淮覽京口三山歷姑蘇汎錢塘徘徊會稽天目之門返憇金陵歷豫章再遊京師日與世外人交不袖一刺即

有知者過之亦未嘗報謝還訪鹿門登泰山南謁衡岳東入郢北遊蘇門百泉高高所至遍覽名勝慷慨懷古長嘯高歌人莫之測時王元美汪伯玉吳明卿徐子與諸人各以其業自雄意不可一世士然靡不倒屣延致斯億掉臂其間傲然無所屈歸華容誅茆蒔竹往元石山中蔬食閉關墨客縉流無間晨夕頽然自放遂以是終事祖母以孝聞居母喪有盜晝入護棺泣盜惻然避去年六十終

劉祖修華容人大夏子不第隱於山足跡不入城市
敦睦宗族人無不愛敬者學臣高其行奉恩例欲冠
帶之祖修辭不受

楊熹臨湘人性至孝篤學慎行省試屢見黜遂潛心
理學從遊者屢滿戶外後舉明經不仕惟欲以德化
人鄉人稱為長者

以上舊通志

常德府

虞善卷皇甫謐高士傳善卷者古之賢人也堯聞得

道乃北面事之舜又以天下讓卷卷曰予立於宇宙之中冬日衣皮毛夏日衣葛絺春耕種形足以勞動秋收斂身足以休食日出而作日入而息逍遙於天地之間而心意自得吾何以天下為哉遂不受去入深山莫知其處按江南之宜興亦有善卷洞然府境枉山有善卷壇隋刺史樊子蓋改為德山郡名常德義有取焉酈道元所謂昔人許以傳疑者故定著為常德隱逸焉

晉伍朝晉書列傳朝字世明漢壽人少有雅操不修
世事性好學以博士徵不就刺史劉弘薦朝為零陵
太守主者以非選例不聽尚書胡濟奏曰朝游心物
外不屑時務守靜衡門志道日新年過耳順而所尚
無虧誠江南之奇才邱園之逸老也不加飭進何以
勸善且白衣為郎前漢有舊宜聽光顯以獎風尚奏
可而朝不就終於家

龔元之晉書列傳元之字道元漢壽人好學潛默安

於陋巷州舉秀才公府辟不就孝武帝下詔曰譙國
戴逵武陵龔元之竝高尚其操朕虛懷久矣可竝以
為散騎常侍領國子博士所在備禮發遣郡縣敦逼
苦辭疾堅不行弟子元嘉亦有德操高尚不仕舉秀
才及州辟召竝稱疾不就孝武帝以太學博士散騎
侍郎給事中累徵遂不起

唐董佺楚紀字庶中武陵人幼嗜詩老而不倦與杜
甫盧象叟李紆遊為荊州從事移疾歸卧武陵劉

禹錫叙其詩云片言可以明百意坐馳可以役萬景
得董生之詩如搏玉屏浮層瀾明金翠羽得於遐裔
非風塵中物也

宋管師復姓譜龍陽人與弟師常俱有盛名從胡瑗
遊師復善詩自號白雲先生仁宗召至問曰卿所得
何如對曰滿塢白雲耕不盡一潭明月釣無痕臣所
得也不受爵命

楊縝明一統志武陵人志在石泉棄官隱桃源山崇

寧間賜號中真處士

周德元楚紀龍陽人以行義聞於時屢徵不就隱居樂善與濂溪九世孫周塤齊名

明唐杲三楚文獻錄字汝陽常德衛人父有養子鵬杲讓產與之以慰父志歲祲煮粥以啖饑者時穀騰貴里中素封競起射利杲為定價白於官卽身自倡始遠近戴之尤喜助人婚葬事以子鍊貴封御史有司請謁逃匿入林子姓強之曰雖非賡官原非實仁

何能一旦羣縉紳出入耶七舉鄉飲不赴壽八十八
無病而逝

辰州府

明李聲遠瀘溪人雅尚志操耽經史宣德間監察御
史薛瑄以賢良方正薦辭不起

縣志

直隸澧州

宋張復晁公武讀書志澧州人作條山集三十卷論
世外事此人兼得鬼神趣隱不仕有文集行於世

明劉瑄字他山澧州人懷宗庚辰進士授翰林檢討以
外艱歸里值寇變避亂衡山以著書自娛花時乘竹
兜攜耆逸玩弄雲煙壽終七十餘

見舊通志

直隸郴州

明王友信字懿安宜章人制行高潔言行不苟宣德
時貢入太學不樂仕進歸而授徒家塾從遊者甚衆
講解不輟

鄺璽字瞻菴宜章人性行端粹知縣馬經聞其賢東

帛請之固辭景泰初詔書求賢知縣陳恭以璽薦聞
特詔徵之辭不赴構精舍於玉溪之澗徜徉以老

以

上舊通志

欽定四庫全書

湖廣通志
卷五十八

湖廣通志卷五十八